

## lis Gnovis

■ **RONCJIS DI MONFALCON.**  
Storie nestre

La presentazion dal libri «Il dirottamento di Ronchi - 6 ottobre 1972» di Marco Barone, ch'al dialogarà cun Luca Perrino a 18.30 dai 24 di Otubar, li dal Auditorium di Roncjis, e siere la schirie dai apontaments «Noi e la Storia. Sguardi e racconti di un passato in comune», immaneade di «Ronchi cultura». Juste tal L inovâl, la convigne di Lunis 24 e profundissarà i fats dal dirottament, tentât tal aeroport furlan, intant dai «Anni di Piombo». L'autôr dal criminâl, Ivano Boccaccio, component di une celule terroristiche fassiste udinese, al fo copât intant di un «blitz» dai polizais. Pe liberazion dai passizirs al veve pretendût la liberazion dal terorist Franco Freda (implicât tal maçalizi di Piazza Fontana) e 200 milions di liris par finanziâ il terorism neri. Cun se, al veve la pistole dal dirigjenti dal «Msi» de Sclavanie, Carlo Ciccittini, ch'è jere stade doprade tal mès di Mai di chel an par argagnâ l'atentât di Petean di Sagrât, cuant ch'a forin copâts 3 carabinieri.

■ **GLEMONE.** A tornin i laboratoris par zeârs

Fra Otubar e Novembar e po fra Zenâr e Fevrâr, par cure dal Ecomuseu da lis Aghis dal Glemonat, a tornin i cors par zeârs, dulà che si podarà imparâ a fâ cossis e zeis cul len di vencjâr, di bacjare e di noglâr. I laboratoris a saran animâts dai mestris Pierino Goi e Fabrizio Madotto. La scuele e à za vût dis edizions e dome il Covid-19 al à rivât adore di fermâle. I scuelârs che si daran in note si metaran dacuardi fra di lôr su lis zornadis, i oraris e lis abitancis dal cors. Par informazions e par notâsi, si podarà doprâ lis direzions: 338 7187227 - info@ecomuseodelleacque.it.

■ **MONFALCON.** La Scuele di animazion dal Teritori

Michele Nolli di Starançan, vincidôr dal premi «Fabio Forcassini 2014» ([www.instagram.com/michele\\_nolli/?hl=it](https://www.instagram.com/michele_nolli/?hl=it)), Fabio Babich dal staff di «Sergio Bonelli Editore» ([www.instagram.com/fabiobabich/](https://www.instagram.com/fabiobabich/)) e Massimo Racozi, «video artist» ch'al à za colaborât cun Elisa, Ligabue, Luca Carboni e Gianni Morandi ([www.instagram.com/massimoracozi/](https://www.instagram.com/massimoracozi/)), a son i animadôrs de Scuele di animazion e di dissen figuratîf ch'è je partide a Monfalcon, in grazie de Cooperative sociâl «Thiel». I doi modui dal cors a laran indevant fintremai tai mès di Fevrâr e di Mai dal 2023, cun lezions ogni miercus, li dal ricreatori monfalconês «Mons. Foschian».

■ **GRADISCJE.** Imagjinis e peraulis

La Galerie regionâl d'art contemporani «Luigi Spazzapan», fintremai ai 27 di Novembar, e propon la mostre: «Dora Bassi. Immagini e parole», curade di «Erpac», l'ent regionâl pal patrimoni culturâl dal Friûl e di Triest (par informazions: 0481 960816 - [galleriaspazzapan@regione.fvg.it](mailto:galleriaspazzapan@regione.fvg.it)). Native di Feltre, Dora Bassi (1921-2007) e à studiât prin a Gurize e po li des Academiis di Florence e di Vignesia. Vie pai agns dal Cincuante, e à operât tal grop neorealist furlan cun Zigaina, Anzil, Canci Magnano e Altieri. Vie pai agns dal Sessante, cuant ch'è tornâ a frequentâ ancje l'Universitât, si avvicina a la sculture. E à colaborât cun Dino Basaldella, cun Davide Boriani dal grop «T» e te clape «Grandes et Jeunes», esponint li dal «Grand Palais» di Paris. Come presidente de clape di feminis artistis «Dars» di Udin, e à studiât e scrit su Frida Kahlo, Louise Bourgeois, Georgia O'Keeffe, Charlotte Salomon. A son stâts publicâts ancje doi siei romançs: «L'amore quotidiano» dal 1998 e «Una notte in fondo al cielo» (stampât dopo muarte, dal 2021; [www.dorabassi.it](http://www.dorabassi.it)). Si po visitâ la mostre ducj i dis de setemane, gjavâts lunis e martars (10-13 / 15-19).

Miercus 19 S. ts Martars Canadês

Joibe 20 S. Irene martare

Vinars 21 S. Ursule martare

Sabide 22 S. Zuan Pauli Il pape

Domenie 23 XXX Domenie vie pal an

Lunis 24 S. Antoni Marie Claret

Martars 25 S. Grispin martar

Il timp Zornadis serenis.



**Il soreli**  
Ai 19 al jeve aes 7.29  
e al va a mont aes 18.14.



**La lune**  
Ai 25 Lune gnove.

**Il proverbi**  
Nissun nol è obleât di plui di ce ch'al è tignût a fâ.  
**Lis voris dal mès**  
Tal zardin plantait lis cevolis di rose  
a une profunditât dople rispjet ae grandece  
de cevole.

## L'Economie dal Vanzeli

*Puars, ambient e lavôr  
a àn di jessi il cûr  
dal sisteme*

**M**il zovins economiscj e imprenditôrs, rivâts di 120 Paîs dal mont, dai 22 ai 24 di Setembar, a àn celebrât la prime edizion muse cun muse dal procès «The Economy of Francesco», screât dal 2019 pòc prin che la pandemie e scombiuâs ogni program e ogni projet. Tal cûr di Pape Francesc, «The Economy of Francesco» al è chel «Cantîr di sperance» e chel «Laboratori di pàs» dulà che la zoventût mondiâl e parturissarà i paradigms economics gnûfs, ch'a coventin par bandonâ il model economic predatori, gjenocidiari e ecocidiari dal di di vuê e par meti tal centri de culumie mondiâl i puars, l'ambient e il lavôr. «Pari, ten sù i lôr desideris di ben e di vite – al à preât il Pontefis, in Assisi, intant de convigne cui protagoniscj de semlee mondiâl –; dâur confuart s'a restin deludûts par colpe di bruts spie; fâs che no si avilissin mai e ch'a vadin indevant pe sò strade. Tu, che il to fi unigenit al à sielzût di fâ il cjarpentîr, dâur la gionde di trasformâ il mont cul amôr, cul inzeagn e cu lis mans. Amen». I zovins economiscj, imprenditôrs, «changemakers», students e lavoradôrs a àn rispuindût a la clamade dal Pape cu la convinzion pandude tal document finâl de convigne, firmât ai 24 di Setembar: «Cussients de responsabilitât che nus toçje a la nestre ete, s'impegnin cumò, ognidun par se e ducj intune, a messedâsi par che l'economie dal di di vuê e ch'è di doman e deventi un'Economie dal Vanzeli. Un'economie di cheste fate e je ch'è che il document finâl di «The Economy of Francesco» 2022 al piture in 12 ponts. E je la culumie «di pàs e no di vuere», che «i fâs cuintri a la difusion des armis, massime chês plui distrutivis». Ch'è ch'è ten cont dal Creat e che no lu rapine». Al è un model economic ch'al servs la persone, la famee e la vite e ch'al à ri-



Il Pape cui zovins imprenditôrs di «The Economy of Francesco»

**Il proclame  
dai mil zovins  
economiscj  
e imprenditôrs  
di «The Economy  
of Francesco»**

spiet di ogni femine, di ogni om, di ogni frut e di ogni vieli e, sore il dut, dai plui debii e menaçts». L'Economie dal Vanzeli, po, e je «une culumie dulà che no 'nd è vanzums ni indiferece, ma curie», «che no lasse indaûr nissun, par fâ sù impen une societât dulà che la pieri butade di bande de mentalitât dominante e devente il cjantonâl. L'impegn dai zovins economiscj al sarà ancje a pro di chel model economic evangjelic dulà che «il lavôr dignitôs e sigûr par ducj, in specialitât pes feminis, al è pupilât»; dulà che «la finance e je amie e aleade de economie reâl e dal lavôr e no un nemî». La gnove culumie, po, e varà di jessi buine «di valorizâ e di tignî cont lis culturis e lis tradizions dai popui, dutis lis speciis viventis e i bens naturâi dal Marimont» e di «combati la miserie di ogni fate, di ridusi lis disparitâts e di savê di, cun Jesù e cun Francesc: «Fortunâts, voaltris puars»». L'Economie seont il Vanzeli, publicade dai protagoniscj di «The Economy of Francesco», e à di jessi ancje «une culumie direzude da l'etice de persone

evierte a la trassendence», «ch'è prodûs ricjece par ducj, ch'è fie gionde e no dome benstâ, parcè che une felicitât che no je conditudine no vâl trop». «Noaltris o crodin in cheste culumie – a sierin il so proclame i mil zovins economiscj, imprenditôrs, «changemakers», students e lavoradôrs congregâts di Pape Francesc in Assisi –. No je un'utopie, parcè ch'ò sin za dâur a fâle sù. E cualchidun di nô, tes buinoris cun cil rampit, a àn za calumât l'ôr de tiere imprometude».

Mario Zili

## Messe par furlan

A Udin, la Messe par furlan e ven cjantade sabide ai 22 di Otubar a 5 e mieze soresere, li de capele «de Puritât», daprûf dal domo (cun Radio Spazio che le trasmet sul moment). E compagnarà la celebrazion la corâl Venuti di Manzine. Al cjantarà messe pre T. Cappellari.

## Tradizions furlanis dal mès par cure di Mario Martinis

## LA BLAVE DES ANIMIS

Tal mont contadin di une volte, te ultime setemane dal mès di Otubar si faseve une racuelte di ufiertes par compensâ il predi pes messis e pai uficis dai defonts cumplîts tal Otavari dai Muarts. Come che si sa, l'Otavari al vignive celebrât dopo dal 2 di Novembar, zornade (o «fieste») dedicate ai Defonts, ven a stâi dai 3 ai 10 di Novembar. Propit parcè che une volte in cheste prime ocasion di ufierte a vignivin dâts al predi prodots de tiere e, secont il ritmi dal calendari, massime panolis o blave apene specolade, cheste cuestule e vignive clamade «blave des animis» (ma e jere dite ancje «cuestule pai Muarts»).

Sicheduncje, secont la credince dal popul, la blave



e servive pal solêf des animis che a purgavin in chel altri mont.

Une volte e jere usance puartâ la blave o altris prodots de nature (ancje adun cun chei des decimis e dai cuartês) in canoniche, o ben te sagristie de glesie o ancje dâur dal altâr maiôr, dulà che cun seglots, cestis e zeis, zornade dopo zornade al cresceve un grant grum che al faseve content il predi e il muini. Cheste tradizion e je vignude mancul viers il mieç Nûfcent, cuant che, passade la fan dopo de vuere e scomençant a zirâ plui bêçs, al plevan che al preave pai muarts par vot dis, i vignivin dadis un pocj di palanchis, fasantlu ancjemò plui content che no a cjapâ blave.